



ЛУИМА



25 февраль
2012 тал
№ 8
(1018)

Газета рётың юсвой ётпос
11 хоталёныл 1989 тал
пасныл варае.

САРИПОС

Ханты-Мансийский автономный округ – Югра газета

ЛЯХХАЛЫТ

РЁТЫҢ ЮСВОЙ ЁТПОС 23 ХОТАЛЭ – ХУМ ХОТПАТ ЯНЫТЛАН ХОТАЛ!

Округувт ёлнэ тының хум хотпаквет!

Округ Дума депутаты ос ам ялпың хоталын кастыл сав ёмас ос сымың латың нанан лавёв!

Тыхотал манав ўргалан махум янытлыянув. Тан щар мак ёмас ос пилтал салтатыг олэгыт. Манах хонт вормаль олыглас, Россияв акваг нохпаты. Ты ман хум хотпанув тан тох ёмашакв мав вуянтыяныл.

Касың хотал тан манав ўргалыяныл. Тан щанянылн-ащаныл манти мав эруптым янмалтавёсыт. Элалё ос аквадох вос олы.

Ман – анё ёлнэ махум, вавгув, нан ёмашакв лусытэгың. Пустэгыл олэн, элы ёлнэ хоталанын посыңыг вос олэгыт, нанти сотыңыщ ос щуниңыщ олэн. Нэмхунг хонтлан вормаль ул вос ёмты.

Округ Дума кўщай
Б.С. Хохряков тётум лётёе
маньщи лётёыл
В. ХОЗУМОВА хавсытэ.

Анё лусытан маньщи пыгыг



Ты маньлат маньщи пыг наме Максим Андреевич Анямов. Тав такви Хальёс районныл Саранпавылныл олы.

Максим мёлты Ханты-Мансийск ўст педколледж астрламе юи-пэлт тара лусытаңкв вуйвес. Ты коньпал тав маньтагыл маньщи ййкванув ос саңквылтапыл саңквылтан тананув мирн суссылтым ма янытыл акваписыг яласас. Та коньпал тав касың тув «Мань ўскве» няврамыт ханищтым рўптиты.

Тав анё Калининград ўст Балтийский намба щарщит ман мав ўргалан нәиңхап тармыл «Оркестрыт» саңквылтан морякыг лусыты.

Титыт хурит ос маньщи пыг пёслым олы. Тав наме Олег Михайлович Ларионов. Омаэ, аятяэ ос каңкаге Саранпавылт олэгыт. Олег маньтагыл соссаң махум каснэ щирыл ханищтахтас. Тав мёлты туй порат саквалан машинат щёпитан ос савсыр машинал яласан хумыг ханищтахтын ма астрлас. Ты коньпал тав Россия янытыл соссаң мирыт каснэ матыт округныл касыс. Тыи магыс мёлты «Кандидат в мастера спорта» намыл майвес. Олег анё Таджикистан мот хон ма ляпат границав ўргалым Душанбе ўст «201 военный базат» лусыты.

Ам тэнатэн газета тара «День защитника Отечества» намба хоталыл янытлыягум. Сав тал пустэгыл олункв, ёмас рўпитан ма хонтункв, каркам нётнэ маньщи аги ёт вайхатункв лавиягум. Төрумн, Отырн акваг вос ўргалавёг. Рўтанэн лусытан маньыл пустэгыл юн ўравёг.

Александр
ВЬЮТКИН

Рётың юсвой ётпос нилахойпловит хоталт Ханты-Мансийский педучилище 80 талэ товлыс. Ты кастыл «Октябрь» намба культура колт пўмаш тэлат вэрыглавёсыт. Тот ты ханищтахтын кол урыл потыртавёс ос сав тал рўпитан хотпат янытлавёсыт.

Ёмас ялпың хотал

Мўйлын колн сака сав махум ёхталасыт, татыл улас щар атим олыс. Ёвлёт М.К. Волдина ханты латёыл эрыг эргыс ос койп ратыс, тащирыл тав мўй махум акв ляпан атсанэ.

Тувыл педучилище пёс пора урыл ос анё тот ёлнэ вормалит урыл кина суссылтавёс. Махум пуссын акв лылытл суссыт, ос кинан пёслым няврамыт халт ханищтан хотпат манос тот рўпитам кўщаит касаланёнылтан тан катпатта ратсыт.

Е.Д. Айпин сака ёмас ос вёщкат латың лавыс: «Ам педучилищат ханищтахтам порам анё тыг мус номилум. Ман тонт сака сымыңыщ ошвесув, ханищтан хотпанув ман янытласанув. Ос пуссын акв яныг колтагыл щирыл аквап-нётхатым, юртыңыщ олсув. Ам ётыл Ленинградыт ос Москва ханищтахтамумт, воссыг тамле ёмас, сымын эрнэ махум ат хонтыгласум.

Тыт щар ёвлёт ханищтахтам соссаң махум халт сав учёныит, нэпак хаснэ хотпат, няврам ханищтан махум мирн ванкве патвёсыт. Тыи Е.И. Ромбандеева, А.И. Сайнахова, Е.А. Нёмысова, Е.А. Кузакова, М.К. Вагатова, А.М. Конькова, А.С. Тарханов ос мотаныт.

Педучилище астрлам сав хотпа ёлнэ мананылт школа манос садик кўщаиг рўпитасыт. Мот эрнэ вормалит тармыл пуңктотсыт. Тан сартын комсомольский, партийныт тэлат элалё тотсаныл, анё ос ты йист товат депутатыг пёриявет».

Тыи солё, педучилище астрлам махум урыл потыртаңкве ке, этыт-хоталыт минэгыт. Тувыл тот кўщаиг ёлнэ хотпат ос касың элмхолас овылтыт янас нэпак хансуңкве рёви. Ман газетавт ос тал палыт та урыл савсыр потрыт хансуңкве тах патэв.

Тамара МЕРОВА



Хумит янытлан хотал

Рётың юсвой этпос 23 хоталэ – ты тал палытыл миннэ сав хоталыт халт акв хотал, хунь хум хотпанув сымыңыщ янытлавет, ёмас лятғыл лававет, мүйлупсал мивет. Ты хотал - мак хум хотпанув тан хоталаныл, армият олнэ хум нйврамыт, ма-вит ос роттыг олнэ нак ўргалан хотпат тан хоталаныл.

Ты тал Хулюмсунт павылныл Кит маньщи пыгыг Армиян тотвеси. Максим Пуксиков тўяг тотвес, Архангельский областит Плесецк ўст служиты. Юн олмет ворт яласаңкв, хул алыщлаңкв сака кәса-

щас. Омадэ Ольга Самсоновна сав тал лёккарыг рупиты, аятэ Владислав Николаевич вездеходыл рупиты, Лена эще Ханты-Мансийск ўст ханищтахты.

Аркадий Вагапов таквсы тотвес, тав Нижний Тура ўст служиты. Ань Омск ўсн хурум этпосн ханищтахтўнкв кётвес, яныг-ёр техникал яласаңкв ханищтаве. 23 щислат «Парад» вәрнэ порат тав ос тот ёмашлаңкв паты. Омадэ Ольга Викторовна школат рупиты, яглаңе Сергей Викторович Давыдов «Служба безопасности» организацият охранникыг рупиты, Макшум ашщитэ ос Юля эще иң школат ханищтахтэг.



Аркадий Вагапов



Павел Алгадьев

Мош молалнув яныг таквс этпост Анатолий Петрович Алгадьев Хулюмсунтың пыг армияныл юв ёхтыс. Новосибирск ўст «ракетный войска» служитас. Армиян миннэтэ элы-палт Ханты-Мансийск ўст ЮГУт ат тал ханищтахтас. Ань «Служба безопасности» ЛПУ организацият машинал яласы. Омадэ Нина Владимировна Алгадьева

ЛПУ организацият контролёрыг рупиты. Танюша ягрище 10 классыт школат ханищтахты.

Павел Андреевич Алгадьев молты тал армияныл юв ёхтыс, Сызрань ўст служитас. Армиян миннэтэ элы-палт Ягрим павылт судоводителиг ханищтахтас. Ань «Газремонтстрой» организацият слесариг рупиты. Омадэ Раиса Владимировна Алга-

дьева «ОРС» организацият лапкат ўрим рупиты. Ирина ягрище школат 11 классыт ханищтахты.

Пёс олум накт, ань олнэ хоталанувт аквтох хум нйвраманув армиян тотавет. Пустағыл вос олэгыт, ёмцакв вос рупитэгыт, армиян тотым пыганув мўсхал щирыл вос служитэгыт, моляхнув юв вос ёхтэгыт.

Анна АНЯМОВА

Таксар ос кәркам хум

Виктор Фёдорович Аникин Челябинский область Магнитогорск ўст самын патыс. Тот яныгмас, школа асталас. Тувыл армиян лўсытаңкве вуйвес. Тонт увщитэ Хальўс район Светлый павылт рупитас. Виктор хунь лусытан маныл юв ёхтыс, увщитэ таве Светлый павылн рупитаңкве вөвыстэ.

1970 талт та павылн ёхтыс ос компрессорный станцият электрогазосварщикыг рупитаңкве патыс. Та пасныл акваг тот рупиты. Павылт атпан нуыл кит тал олы. Ты коньпал вораим ос хул алыщлым яласы. Тав анумен такви уретыл потыртас.

«Ам хунь павылн ёхтысум, махум газ винэ компрессорный станция унттысыт. Яласан лёңх тот щар атим олыс. Таймагыс ман овлэт лёңхыт вәруңкве лаввесүв, матэ тот янытэт яңкылмаң. Тракторыл норыт хартыглавесыт. Машинат ёмцакв яласаңкве вос вөрмысыт, ман норыт лёңх палытыл састумыг пинтлысүв.

Овлэт сака тарвитың олыс. Туи порат яңкылма тармыл сака вуцлах ос лёмвоиң, тэлы порат ащирмаң. Тох та рупитасүв. Това махум ат

вөритасыт, ювле олнэ мананыл миныгласыт. Туп щар таксар хотпат хулытсыт. Тонт ман, маньлат махум, яныг щагтыл рупитасүв. Тарвитың рупатал ат пилсүв.

Ётыл лёңхыт асталсанүв, компрессорный станция рупитаңкве вуйвесум. Ань номилум, тот ляпат вөр щахыл олыс. Туи порат ўцлахтынэв сыс тув лахыс атуңкве акваг хайтталалсүв. Тувыл 1975 талт компрессорный станция янытэт асталсүв. Перегрёбный павылн рупитаңкве ос кётыглавесум.

Аквписыг тыглэ-тувле яласасум, торың юн ат олывласум. Аквматнакт эквамёнтыл алаты Перегрёбный павылн вантлысмён. Ёмцакв номсахтасмён, тыт та хулытсумён. Ань газ нөх-винэ мат пуссын аквёт ват тал ты рупитэгум. Эк-

вам ос Светлый павылт пенсиян патме мус тәрпи тыналан колт рупитас.

Хунь овыл щёс тыг ёхтысум, сытам вөрквет сав вөрүй, ят сав хул олыс. Матахмат тал олсум, тувыл эрнэ нэпакыт вәрсанум, писалъ ёвтсум. Таквсы, атырхари алпыл акваг вораыңкве ялантасум. Щёпыр манос ятри патамтэгум. Ётылнув янас вораен мал майвёсум. Тот договор щирыл рупитасум.

Тыт олнэ ма-вит татем сымумн хояс. Вөркол унттысум, ўцлахтын хотал ёмты, тара вөрн минэгум. Маньлат порат кәркамыг олсум, хотал сыс хусахкем вөрыста лаглыл ёмсум. Тот касың ййв, урам, союм пуссын ёмцакв ваганум. Хосан яласанэм магыс эквам мош кантлыс. Ань вөрүвт маколыңойкат, сәлыпурнэуит яласэгыт. Ам магсылум пиныс. Маколыңойка ёт сав щёс вәциньтахтасум, (мовиньты) тав ануменыл рохты, ам ос тавёныл рохтэгум, киттыг та хайттымён.



Та мат сав тал вораысум. Тувыл йис ма урыл йильпи сәккон нәглыс. Эрнэ нэпакыт ат вәрсанум, ма амки нупылум ат хансылум. Ань морсың порат щёпыр алыщлаңкв, тўяг ос вәс пәтлуптаңкв тув ялантэгум. Мошёртын пенсиян минэгум, ты палыт ма ёмуңкве тарвитың. Ты вәрмалъ ёмас, вораен макем элын олы. Махум тув ат ялантэгыт. Вөрүй мори ат алыщлаве.

Махум татем щакрыг ёмтсыт, ворт маныр нёвсы, тара алапияныл. Тованакт тох ёмталы, матыр вөрүй патамтыяныл, ат ке эри, ворт та вуцкасыяныл. Сав щёс патамтым вөрүй хонтыгласум.

Ты тал таквсы порат акв щёпыр, ат ятри магыс лицензия-нэпак вуй-

ласум. Ворт мош ёмыгтасум. Акв щёпыр, кит ятри ворил ты катынпаттысум. Павыл ляпат торың нэматыр атим. Сартын нөхыс, матыр-ати пуссын олыс. Ань ты накт мөрсың порат лёңх кәсалэгыт. Мори вораен хотпатн алыщлавесыт. Товат эрың мот ман минасыт, тыт щар мощца вөрүй ань хулытс.

Виктор Фёдорович олнэ матэ сака эруптытэ. Светлый павылн ёхтыс, ань тувыл воссыг нәмхотталъ минуңкве ат таңхи. Вөр ўргалым оныщитэ. Ты мўтраң хотпан ам пустағыл олнэ латың кётэгум. Колтаглэ сөтыл вос пинаве. Элалъ олнэ хоталэ акваг посыңыг вос посты.

Николай НИКИТИН

УЙХУЛ АЛЫЩЛАН ВАРМАЛЬ

«Яун-Ях» община рупататэ урыл



Югончининт щемья

1992 талт округувт «О статусе родовых угодий» намба положение пирмайтес. Тонт Сургутский районт Большой ос Малый Юган яг хосыт олнэ ханты щемьят угодияныл танки нупыланыл хассаныл. Тан ань пуссын ворт манос мань павылквет щемьян тагыл пёс йис щирыл олэгыт.

1996 талт Сургутский район Угут павылт «Яун-Ях» намба община вәрвес. Ты яг ватат олнэ щемьят пуссын тот рупитаңкве патсыт. Ань 470 ханты хөтпа тув ловиньтахты. Тан хул алыщлэгыт, вораегыт, пил ватэгыт, маснут ос савсыр сувенирыт тыналан магсыл юнтэгыт.

«Яун-Ях» общинат сав тал кущаиг Владимир Семёнович Югончин рупиты. Людмила Леонидовна экватэ ос пыге Игорь Владимирович ты община воруңкве тавен нётсг. Пыге ань «Кантык-Ях» коммерческий предприятие такви пунсыс ос кущаиг тот рупиты.

Общинат касың хөтпа такви янас рупата оныци, ханты хөтпат хул алыщлым, вораим, пил ватым, ләхс атым рупитэгыт. Төваныл ты тэнутыт элаль тыналэгыт. Мот хөтпат савсыр эрнэ пормасыт тынталнувек өвтэгыт, мотаныт нэпакыт эт рупитэгыт.

Пёс йис мат олнэ щемьят пуссын Угут павыл нупыл хансым олэгыт, миркол тот олы. Ань тан пуссын ты общинат рупитэгыт, матхурип нэпак эрмыглы ке, пуссын Людмила Леонидовна палт ювыт.

Тав нэпакыт эт рупитаңкве ёмащакв хасы, касың хөтпан нёты. Ань та махум ворт олым, школат аты ханищтахтасыт, матум хөтпат хансуңкве ос ловиньтаңкве ос щар ат хасэгыт. Пенсия манос пособие-олн магсыл эрнэ нэпакыт хумус акван-атуңкве, щар ат вагыт.

Людмила Леонидовна лави: «Общинат ам тамле рупата вәрөгум. Касың щемьян туй яныг вит порат найңханыл тув тэнут ос мот эрнэ пормас кетөгум. Найңхәп касың щемья палт пәг-пұхталы ос ханты хөтпанув тэнутыл тогыанэ. Мән тамле порат саккар, колас, бензин, партыт ос мот савсыр тэнут-пормас тув тотэв.

Тэлытувмус «Бураныл» туп ёхтуңкве рөви. Тамле утыл сав тэнут ос пормас вөрн ат хартэгын, мән туп туй пора сыс алымёв. Ты элыпалт касың щемья заявка-нэпак хансы, манхурип тэнут, маснут ос пормас тананылн эри.

Ты коньпал Большой Юган я вата хосыт унлын хурум павылт мән лапкат оныщев, тув тэнут, маснут тотыглэв. Тэнут ат ке төвылхаты, махум тот ёвтуңкве вөрмёгыт. Угут павылт лапка ос оныщев, тыщир манки олн сэлэв, ворт олнэ махумн мощ нётэв.

Махманув манасавит хул пувёгыт, манасавит пил ватэгыт, тасавит олн сэлэгыт. Төва щемьят нефтяникыт ёт соглашение-нэпак щирыл рупитэгыт, тувыл олныл ос ойтавет. Касың щемья матхурип пособие-олн виңкве вөрми. Тувыл ты пособие воруңкве Угут павылн ёхталаңкве эри.

Ам касың хөтпан ты нэпакыт акван-атуңкве нётэгум. Тан аты вагыт, манхурип пособият ань олэгыт, манхурип нэпак ты кастыл эри. Ам палтум ёхталэгыт, ты нэпакыт мән аквёет акван-атыянув. Ам мирн нётнэ Департамент ёт акваг рупитэгум, ворт олнэ ханты щемьят нэпаканыл тув кетыянув.

Ты элы-палт ханты павлыт мус вертолёт яласас. Яныгпала хөтпат пенсиял ос нэ хөтпат пособие-олныл тотыглавёсыт. Тувыл ты ёмас вәрмаль 2004 талт хот-вуйвес, кущаигт лавсыт, вертолёт тув кетыглаңкве сака тының, ворт олнэ махум олнаныл магсыл танки вос ёхталэгыт.

Тан Угут павылн касың ётпос ёхталаңкве ос ат вөрмёгыт. Яныгпала

махум ос мань няврам ошнэ нэкет анумен доверенность-нэпак хасыт. Ань 61 яныгпала хөтпа пенсияныл ос 18 няврамың нэ пособие-олнаныл ам выганум.

Тувыл хурум павылт мән базат оныщев, тот акваг олн олы. Ам тувле нупыл спутниковый связь хосыт лавёгум, манасавит яныгпала хөтпат пенсияныл ос нэкет пособие-олнаныл. Тувыл тот рупитан махманув ты олн тананылн ойтэгыт.

Тамле рупата воруңкве манавн миркол ке нётыс, тонт тай мощ ёмаснувек олнув. Молты тал туг яныгполь эт-

хотталы ёстувёсыт. Тыи магсыл щар мань пенсиял ойтвес. Тав ос ам палтум ёхтыс, ам хоса тав нэпаканэ кинсым, мот-мот мән пищма кётыгласум. Пуссын нэпаканэ хөнтсанув, ань ёмас савит пенсиял ойтаве.

Тыт олнэ ханты хөтпанув сака нёмсат, савсыр кущаигт палт ялантаңкве сака ат касащегыт, тыи магсыл амки акваг уральтым оныщиянув. Мәнлат нэкет нявраманыл пособие-олн магсыл нэпакыт акван-атуңкве ос ат таңхёгыт. Такос лавиянув, нэпаканыл тыг вос тотыяныл, тан ати савыңыт, нас ёссамтэгыт.



пост аква ханты хум самын патум нявраме намнэпаканыл воруңкве тыг ёхталас. Тыт нилахуйплов хөтал тав мирколн ялантас, нявраме ты нэпакыл аты вәрыстэ. Тав ювле вөрн минуңкве атхатас, ам палтум ёхтыс, мән аквёет тув ялсумён, ты юи-палт уцта нэпакыл вәрвёс.

Аква хум хөтпа ос сав тал тыт хул алыщлым ос вораим рупитас. Пенсиян миннэ элы-палт нэпаканэ акван-атуңкве овылтахтас, кихатуңкве патыс, нэпаканэ

Матыр вёвуңкве, тан щар ат ханьщувласыт. Маныр пувёгыт, маныр алэгыт, тыил элаль олэгыт. Ам 40 тал сыс тыт ханты махум ёт рупитэгум, вәглум, тан пуссын тамлет».

Ам Людмила Леонидовна пумащипа лавёгум. Тав тамле сымың хөтпаг олы, касың ханты щемья магсыл сыем щарги, касың хөтпа ўргалым оныщитэ. Пустыгыл элаль сав тал вос олы.

Людмила ТАСМАНОВА
Ты хурит Л. Каюкова вәрыс.



ХАНИЦТАП

Няврамыт щань латңын хаництаңкв ань тәрвитың



Округувт сав ханты манос мәныңи павыл олы. Та павлытт рупитан школат няврамыт щань латңыл потыртаңкв хаництавет. Ань ты йист тананыл хаництаңкв тәрвитың. Ты урыл ануи Ванзеват павылт рупитан нә потыртас.

Тав наме Татьяна Валентиновна Молданова. Ты Ас нә сатхуйплов арыгтем тал школат рупиты. Павлың няврамыт овыл классытт хаництыяна. Рупататә урыл

тав тох потыртас.

— Ам амти тыгыл олэгум, тыт самын патсум, тыт яныгмасум, школа асталасум. Та юипалт Ханты-Мансийск үсн педучилищан ми насум, тот начальный класс учителиг хаництахтасум. 1994 талт ювле ёхтысум, тыт рупитаңкв та патсум.

Ань тыг мус ам овыл классытт рупитэгум. Ос 3-4 классыт няврамыт ханты латңыл потыртаңкв хаництыя нум. Ань ты классыт олнә няврамыт акван-үнттувёсыт, 4 классыт ат няврам ос хурмит классыт туп тит няврам хаництахты.

Тан халанылт шар нәмхотыют ханты латың ат ваг. Щаняныл-ащаныл юн ос шар ат потыртэгыт. Ос учебникыт пуссын латың ванә няврамыт магыс хансым олэгыт. Урокт няврамыт ёт манавн тәрвитың рупитаңкве.

Ань наука рупата вәрнә махум йильпи ханты алфавит хассыт, акв «О» буква хурум щирыл хансым олы. Мәнь няврамыт хунь торгатэгыт, касың буква хумус ловиньтаңкв. Таи лёлль, акв алфавит ат оныщев. Мән, тыт олнә Ас махум, «обской» хантыг лававев, ос няврамыт «казымский» диалектын хаництыя нүв.

Та хультум талт туйа порат интернет хосыт сапрәни вәрыглавес. Мән титыглавесүв, школавт маныр ат товылхаты, эрың матыр ёвтуңкв эри. Школа кущаюв Софья Романовна Балашова потыртас, учебниканув пуссын сака пёсыт, 1995 тал порат таратымат. Тувыл таквсы йильпи нәпакытыл та тотвесүв. Няврамыт сака щагтыт. Тананылн ань хаництахтуңкв пумыщ. Мән ос хумус вөрмев, тащирыл та рупитэв.



Т.А. Молданова хаництан пыгрищанә ёт послым олы.

Ас махум йильпи алфавит хансэгыт

Ретың юсвой этпос акв хотты хоталёт Ханты-Мансийск үст олнә Ас махум акван-атыглавёсыт. Пуссын аквёт атхуйплов хотпа олыс.

Ань наука рупитан махум ханты йильпи алфавит хансэгыт. В.Н. Соловар ос Е.А. Нёмысова, тит учёный хотпаг, тән сас янас алфавит щёпитасыг. Ань ты этпост атхатыглам махумн Валентина Николаевна Соловар такви алфавитә суссылтастә ос йильпи щирыл хумус хансуңкв эри, пуссын хаництасанә. Тав хансум алфавитә щирыл — 29 буква олы. Тав щирётыл тох хансуңкв эри: **Е** буква — **ЙЭ**, **Ю** буква — **ЙУ**, **Я** буква — **ЙА**. Ос ты букват **н**, **т**, **л** тит щирыл хансавет.

Евдокия Андреевна Нёмысова алфавит ос шар мот щирыл хансытә. Ань округ Правительства палыл тан пуссын лаввёсыт — латңаныл моляхнув акван вос ёхты ос йильпи алфавитаныл ёмашакв вос хансыяныл.

Валентина ВАСИЛЬЕВА

Эрнә рупата вәраве

Ретың юсвой этпос 8 щислат Россия янытыл наука хотал янытлаве. Мән мавт ты ялпың хотал 1999 тал пәсныл вәрыглаве. Та талт ты наука Академия пүсвес.



Ань ты кастыл Ханты-Мансийск үст Югорский университетт доктор, кандидат нам ошнә хотпат ос ляххал тотнә махум акван-атыглавёсыт. Учёныт манырыс рупата тот вәрэгыт, ты урыл потыртасыт.

Ань Югорский университетт сав учёный хотпат маңьлат махум

хаництэгыт. Тот хаництахтын агит-пыгыт сав эрнә проектыт хансэгыт, номтыт ошнә вәрмаланыл элаль тотыяныл. Тан энергетика, геология, ма-вой, газ, технология ос мот вәрмалит щирыл савсыр рупата вәрэгыт. Ты тәланыл хаництан магыс учёный хотпатн нәтавет.

Татьяна Дмитриевна Карминская, технический наука кандидат нам ошнә нә, ань Югорский университетт ректоры рупиты. Тав лавыс: «Ты ялпың хотал кастыл мән университетувт овыл щёс тамле яныг мероприяте вәрсув. Аспирантурат хаництахтын махум халт «Молодой учёный года» касыл щёпиталыгласув. Тан танки рупатаныл суссылтасаныл. Щар ёмас рупата вәрүм хотпат янытласанув. Научный рупата вәрүм агит-пыгыт ты хоталытт лекция ловиньтасыт. Тувыл нәпак ловиньтан колт суссылтап атыгласув, няврамыт вәрүм научный рупатаныл тот суссылтасанув».

Ань наука элаль тотнә магыс Государство палыл нётмил вәраве. Округ экономикав акваг нөх вос савмыс, наука щирыл сав рупата вәруңкве эри. Йильпи ищхыпың утыт хосыт мән округув акваг элаль

мины. Олупсав кұпнитыг вәрнә магыс учёный хотпанув йильпи тәлат кинсым рупитэгыт.

Югорский университетт хурум институт олы — ты политехнический, информационный технология ос ма-вит үргалан институтыт. Тот сав номтың маңьлат хотпа хаництахты. Тот ты няврамыт шар мак наука рупата хаництэгыт. Тан мән мав магыс эрнә вәрмал вәрэгыт. Ты коньпал экономика ос гуманитарный институтт агит-пыгыт ос савсыр наука хаництэгыт.

Владимир Захарович Ковалев, технический наука доктор нам ошнә хум, университетт профессоры рупиты. Тав энергосбережение вәрмал щирыл сав научный рупата вәрыс. Ань няврамыт ты вәрмалин хаництыяна.

Тав ты урыл лавыс: «Касың хотпа вагтә, ань найпос юв үрнә магыс светодиодный йильпи лампат вәрвёсыт. Ты хосыт сака сав энергия ат холы. Округувт шар сав найпос ма-вой ма-

ныл нөх-винә порат холтаве. Таимәгыс мән тамле рупата вәрсув, ань ма-вой винә порат китхурум процент найпос юв үрөв. Ты юв хультум процентыт хосыт мән Ханты-Мансийск яныт матахмат үс ань найпосыл мыганув».

Ты учёныт Югорский университетт ос акв тәла хосыт рупитэгыт. Округувт сав мат «попутный» наппа газ наскассыг пеламтаве. Ты газ винә магыс сав найпос холтаве. Ёты-овылт тав нас тэг, мавит ос лылыёп паңкты. Ань ты газ наскассыг ул вос тәс, тан таве рөг ос электроэнергия нупыл холтуңкве патсаныл. Тыщир Югорский университетт рупитан учёный хотпат тан сартын вәруңкве номылатасыт.

Ты коньпал тот рупитан учёный хотпат, аспирантыт ос хаництахтын няврамыт савсыр мот эрнә рупата вәрэгыт. Тан рупатаныл кұпнитыг вос олы. Ос сав йильпи, эрнә номт элаль вос тотэгыт.

Николай МЕРОВ

Лүимә сәрипос
Адресув: 628012, Ханты-Мансийск үс,
Комсомольский үсхулы, 31 кол.
Телефонанув: редакторув 8(3467)33-36-82 (факс);
редактор ваңын нәв 33-22-72; корреспондентанув
33-23-09. E-mail: luima@ugracom.ru

Учредитель — Ханты-Мансийский
автономный округ — Югра
Правительство. Издатель —
Ханты-Мансийский автономный
округ — Югра Общественный
связь Департамент.

Газетав вәрнә кол
(типография)
адрес: 628012,
Ханты-Мансийск,
Мира үсхулы,
68 кол.

Газета печатин хансыслув
13.00 щёст 22.02.2012 талт
Индекс 04399.
Заказ 55. Тираж 308.
Газета сәтт посын акв щёс
таратылув

Редактор
Ранса Решетникова
Редактор ваңын нә
Галина Кондина
Ответственный секретарь
Валентина Узель